

## Тосна завод тосхлгън

Элст балгъсна Кировск уульн-цин ар захднь бӑргдджӑх тосхлтд тасрлтан угагъар машид тосхлтин материалмуд авч ирдж буулгъцхана. Одр ирвӑс чолуд яралддж нег-негӑн дерлдж, герин эрс ӧндртӑн ӧсдж, кӧдлмш кегдджӑнӑ.

Тосхлтин кӧдлмшд сӑн ӱзмдж-тӑ кевӑр Мейроян Владимир, Данилов Гурген, Данилов Александр, Оконов Дреник болн Данилов Аршак кӧдлцхӑнӑ. Эдн тосхлтд кергтӑ материалмуд бийснь белддж, эрс тӑвлгънӑ кӧдлмшиг ӧдрӑ норман 120-130 процент кӱцӑнӑ.

Тосхлтин материал зӧдг шофермӱдӑс Пушкарев Гаврил, машидт аца ачдж-буулгъдг кӧдлмшчирӑс Манджиев Геннадий болн Мамонов Ермак ӧдрӑ норман 120-125 процент кӱцӑцхӑнӑ.

Хотл балгъсн Элстин олн ӧмтсиг даругъас ӱс, тосар, морожн, кефир болн творогар тетгхин кергт механизированн тосна завод энӱнд бӑргдджӑнӑ. Эн тосна заводиг Элст балгъсна, Приютненск района, Вознесенск болн Троицк селӑнӑ колхозмуд болн совхозмуд ӱсӑр тетгхмн.

**ЭЛЬДАН ЭРДНЬ.**